

lis Gnovis

■ GURIZE. Par no dismenteâsi

Ai 23 di Novembar, Gurize e à memoreât la pagjine dolorose e vergognose de deportazion dai siei borghesans ebreus, inmaneade in chê di dal 1943 dai «SS» naziscj, cu la complicitât e cul jutori dai fassiscj locâi. Di chê strade, a son stadis dedicadis altris cuatri «Stolpersteine», al ven a stâi lis «pieris artistichis par inçopedâsi» inventadis e realizadis dal artist todesc Gunter Demnig. I gnûfs monuments «dal bas» a judaran a impensâsi di Emma Pia Morpurgo Valobra, di sô fie Elsa e dai spôs Amelia Pavia e Elio Michelstaedter. Prin de cerimonie, compagnâts dal president dai «Amici di Israele» di Gurize, Lorenzo Drascek, i fruts de Scuole mezane «Locchi» a àn netât dutis lis «Stolpersteine» gurizanis, che in zornade di vuê a son 27 e che, dentri dal 2025, a memorearan ducj i deparatâts de Comunitât ebraiche.



■ MOSSE. La çate de mafie

«Libera», ch'è je la federazion des clapis plui impuartantis impegnadis in Italie par combati cuintri da la mafie, e à publicât tal so cjanâl «YouTube» (<https://youtu.be/h9watPLCbP4>) la convigne dedicade a lis menacis di «Mafie e criminalità nell'Isontino». Intant des voris dai 24 di Otubar, Massimo Bressan al à pandût l'ativitât dal «Presidio e dal Coordinamento di Libera goriziano». L'assemblee, po, e à nomenât Francesca Giglione par dâi la volta a Bressan. Di «Covid economy», di riciclamet dai civanz des ativitâts criminâls, di trafic di scovacis (cui câs di «Pecol dei Lupi» e di Mosse) e di altris criminâi ambientâi a àn fevelât il procuradôr Antonio De Nicolò, l'avocat dal Centri di azion juridiche di «Legambiente» Daniela Moreale e Roberto Declich dal sindicat de Polizie «Sulps».

■ TRIEST. Une rêt fra Ecomuseus e Fogolârs

Par cure dal Ent «Friuli nel Mondo», ur rivarà a ducj i Fogolârs il documentari «La Memoria della Terra (Viaggio negli Ecomusei del Fvg)». L'opare, realizade de regjiste di Montréal, Roberta Cortella, cul jutori dal operadôr Marco Leopardi, e je stade presentade li dal Consei regjonâl, ai 23 di Novembar. La difusion midiant dai cjanâl «web» e «social» e varès di favorî la vision des tiercis e des cuartis etis de Diaspore furlane. Esplorant la rêt dai siet Ecomuseus de Patrie – e à declarât Cortella – «o ai procurât di trasmeti sore il dut lis emozions des personis».

■ PORDENON. Malâsi di mal aiar

In spieta dal Plan regjonâl de cualitât dal aiar, che la Regjon e je daûr a metilu in zornade daspò de edizion dal 2013, a Pordenon si à scrutinat i dâts dal scandai «Ecosistema Urbano 2021» di «Legambiente». In cont di cualitât ambientâl, la classifiche taliane nus dis che Pordenon al rive cuint (ma an passât al jere tierç), Udin diesim tierç e Gurize trentesime seconde. La cuistion e je stade frontade di Renato Marcon, di Raffaella Manca (ch'è a profunditê sore il dut i câs di Spilimberc, di Manià e di Fane), di Mirko Laurenti e di Monica Cairolì. Lis relazions e la regjistrazion dai 13 di Novembar si cjatilis tal lûc internet regjonâl di «Legambiente».

Miercus 1	S. Eliggi v.	Domenie 5	Il Domenie di Avent
Joibe 2	S. Cromazi di A.	Lunis 6	S. Nicolau v.
Vinars 3	S. Francesc S.	Martars 7	S. Ambrôs v.
Sabide 4	S. Barbare m.	Il timp	Cil seren e glaçadis.



Il soreli
Al prin al iève aes 7.29
e al va a mont aes 16.23.



La lune
Ai 4 Lune gnove.

Il proverbi
Fasarai al è fradi di fâ mai.

Lis voris dal mês
Il nestri ort al sta polsantm se il cil i regale une coltre blancje di nêf al polsarà ancjemò miôr.

Tirâ dilunc nol cure

*La tiere e je malade,
ma l'Europe no ferme
la dilapidazion*

Intant che il Friûl al condure saldo a dissipâ teren – 63 mil 267 etars, vie pal 2020, ch'â corispuindin al 8% dal teritori, cuntune incressite nete ad an di 65 etars disvinidrits, seont la statistiche dal Istitut statâl pe protezion dal ambient (www.isprambiente.gov.it/it/attivita-suolo-e-territorio/il-consumo-di-suolo/i-dati-sul-consumo-di-suolo) – la Comission europeane e à fate buine la «Strategjie dal Teren pal 2030», fasintle jentrâ ad in plen tal «Green deal europeu».

Il document uficiâl, bramât e suspirât, al à stât publicât ai 17 di Novembar (https://ec.europa.eu/environment/publications/eu-soil-strategy-2030_en). In dut câs, ancjemò une volte, la note dai principis e dai obietifs e je clare e polpose, ma il timp concedût par metju in vore al è sprolungjât in mût spropositât. Par un esempi, si scugnarà protezi i terens e regolâ chei danezâts; si varà di garantî che la tiere e sedi doprade in mût sostenibil... ma par rivâ al obietif che ducj i País de Union a fermin dal dut il consum di tiere («zero net land take») si varà timp fintremai tal 2050 e la plui part des azions necessariis par «vuari» lis purizions di «tiere malade» si podarà fâlis a pene dentri dal 2030. Cun di plui, si sprolungie fin tal 2023 il timp pe redazion di une leç gnove su la «salût dai terens».

Fra i principis, tant e tant, si tome a bati sul fat che la salût da la int e dipent de salût de tiere, par vie che dome un teren san al pues produci mangjativis sanis. Adotât il criteri dai «Servizis ecosistemis», la Strategjie europeane e pretint che l'incuinement al sedi tornât a puartâ



Urbanizazion, agroindustrie, criminâi ambientâi (te foto il fûc te discariche abusive di Mosse), a disvinidrisin ogni an miârs di etars di campagne

La «Strategjie dal Teren» de Union si contente di spietâ il 2030 e il 2050

disot dai limits danôs pe salût des personis e dai ecosistemis. Seont la Comission europeane, la «gestion sostenibil dal teren», stabilide de gnove Strategjie, e varès di jessi garantide dai imprescj de «Politiche agrarie comunitarie», ma cheste prevision e à scandalizât e ofindût ancjemò di plui ducj chei ch'â son daûr a contestâ parie anje la «Pac», votade dal Parlament europeu ai 23 di Novembar. «Il belanç di chel plan fundamentâl – al à berlât «Slow Food» – al è un disastri ch'â scugnaràn paia il so cont, come simpri, lis aziendis agriculis plui piçulis, l'ambient e la clime», parcè che te «Pac» a son confermâts in plen «i finanziaments

a l'agriculture industriâl, distrutive e insostenibil».

Il stes judizi negatîf al è anje chel des clapis da la coalizion taliane «#CambiamoAgricoltura», ch'â son ladis a tamesâ il «Plan strategic talian», dulâ che l'Italie e varà di sclari la sô maniere di adotâ i principis comunitaris. In chest document – e à declarât la coalizion – «no sin nancje plui devant di un tentatîf di «greenwashing» (al ven a stâi di un ambientalisim par fente, ndr.), ma in face di un vèr acuardi a pro de agriculture industriâl, imbastît par meti de bande i impegnis pal ambient e pal lavôr, come s'â fossin dai fats marginâi».

Mario Zili

San Vît dal Tiliment. Une lûs su la disabilitât

Ai 3 di Dicembar, intant de «Zornade mondiâl de disabilitât», cuntune trentine di compagns, Valentino Gregoris al marçarà di San Vît dal Tiliment a Lignan, dilunc dal arzin dal Tiliment. Sul cerneli a varan une lûs impiade par «iluminâ lis problematichis leadis cu la disabilitât e cul autism». L'iniziativa e je prudelade de clape «Noi uniti per l'autismo» di Pordenon, che Gregoris al è un dai voluntaris, impegnâts te sensibilizazion de opinion publiche.

Messe in marilenghe

A Udin, la Messe par furlan e ven cjantade ogni sabide a 5 e mieze soresere (17.30), li de capele de «Puritât», daprûf dal domo. Sabide ai 4 di Dicembar al cjantarà messe pre T. Cappellari. Radio Spazio e trasmet sul moment, ogni setemane, dute la liturgjie.

Peraulis in dismentie par cure di Mario Martinis

❖ SGLOVÂ

v. = piegare o schiantare dal troppo peso, strappare (solitamente dei rami)
(dal nome glòve «biforcazione dei grossi rami d'albero» con il prefisso s- rafforzativo)
Mi si è sglovât il ramaç sot i pîts.
Mi si è piegato il ramo sotto i piedi.

❖ SGORLÂ

v. = scrollare, scuotere (probabilmente dal latino parlato crotulare, corrotulare «muovere dimenando», composto da rotulare ed il prefisso rafforzativo s-)
Ma çe âstu tant di sgorlâ il cjâf?
Ma che cos'hai da scuotere tanto la testa?

❖ SGRIFE

s.f. = artiglio
(dal longobardo grifan «afferrare» con il prefisso s- rafforzativo)
Il gjat al sta pôc a meti fûr lis grifis.
Il gatto sta poco a mettere fuori gli artigli.

❖ SGRIFIGNADE

s.f. = graffio; rubacchiare (lo sgraffignare)
(da sgrife «artiglio», dal longobardo grifan «afferrare» con il prefisso s- rafforzativo)
O soi restât tant mâl cuant che la gjate mi a dât une sgrifignade te muse!
Sono rimasto tanto male quando la gatta mi ha dato un graffio al viso!

❖ SGRIMIE

s.f. = aspetto, fisionomia, ingegnositâ
(dalla forma verbale sgrimî «sforzarsi, ingegnarsi a lavorare», composto verosimilmente da grim, grin 'grembo' nel senso traslato di luogo da cui nascono idee, continuatore di grēmium «grembo; cuore»)
Al fâs l'intaiaidôr, ma no mi pâr che al vedi tante sgrimie.
Fa l'ingegnoso, ma non mi pare abbia tanta ingegnositâ.